

BATAKURU PUULUSA DIMMURU HAA E TIMOTEE

1 ¹Immorde e an min Puulusa, mo Alla hoddiri wonugol *sahaabaajo Iisaa Almasiihu on, e telen-ma fodaari ngurndan wondan e Iisaa Almasiihu on dan.

² Mi salminii maa yo Timotee, an oo boobo an mo mi yidi fota. Yo Alla Baabaajo on e Iisaa Almasiihu Joomi men on yede moyfere e yurmeende e buttu.

Fii no Puulusa Wakkiliniri Timotee

³ Mi yettii Alla, on mo mi woni rewude, wano baabiraabe an ben non, e dowbernde laabunde, e hoore mi alaa yejjitude fii maa e nder torndeeji an din jemma e jalorma. ⁴Ko fii mido andita fii gondi maa din, awa mido faalaa yi'itudo ma fota fii no mi heewira weltaare. ⁵Mido andita kadi gomdinal wongal e maa ngal, ngal aldaa e faasiqankaaku, wonnoongal e pati maa Lowiisi e yumma maa Eniisi, wano mi fellitiri non hingal e maa. ⁶Kodun wadi si mi wakkilinii ma hubbitugol ngal dokkal Alla, ngal hendornodaa *fawugol juude an den e hoore maa. ⁷Ko fii ruuhu mo Alla yedi en on wonaa wadoowo en hulube, kono ko ruuhu okkoowo en doole e giggol e waawugol hoore mun.

⁸ Awa wota a hersir seeditanagol Joomi men on, e min sokiraado sabu makko on, kono tampidu e an fii Kibaaru Moyyo on e dow bawgal Alla, ⁹on Dandudo en, noddi en fii no nabiren ngurndan men dan no laabiri, hara hinaa sabu kuude men den, kono ko sabu haajaande makko nden tigi e moyfere nde yediraden sabu Iisaa Almasiihu on nden, ado saa'iji poomayankeeji din. ¹⁰Nden moyfere banginiraama jooni feejugol Iisaa Almasiihu, Dandudo en on, on muncudo doole mayde nden. Ko Kibaaru Moyyo on o fejnjinirani en ngurndan dan lannataa dan. ¹¹Ko fii oo Kibaaru Moyyo mi wadira waajotoodo e sahaabaajo e jannoowo. ¹²Ko sabu dun mi hebiri dii satteendeeji. Kono mi hersaa, ko fii mido andi ko hombo

mi gomdini, awa mido felliti himo mari bawgal hiwugol ko mi halfinnaa kon haa e nalaande jaawoore nden.

¹³ Awa jogito sifa dii kongudi selludi di hendordaa mi, e nder gomdinal ngal e giggol wongol ngol e Iisaa Almasiihu on.¹⁴ Jigitodaa kaliifu moyyo mo hendordaa *Ruuhu Seniido on, dun ko Wondo e men on.

¹⁵ Hida andi wonbe leydi *Aazii ben fow tertike lan. Figeeli e Hermogaana no tawaa e ben.¹⁶ Yo Joomiraado on tippin yurmeende mun nden e hoore beynguure Onesifoora nden, ko fii himo mujjinaynood lan soono woo, awa kadi o hersiraano ko mi sokaa kon.¹⁷ E hoore dun, bay o arii Roomu, o catino e dabbitugol lan haa o yi'imm. ¹⁸ Yo Joomiraado on yedoy mo yurmeende mun nden jnande jaawoore nden. Hida andi buri wondo woo haa honto o wallimmi ko mi woni Efeesi.

2 ¹ An kadi non, yo booboo an, tiidinor e moyyere wonde e Iisaa Almasiihu on nden.
² Ko nanirdaa mi kon e tawnde seedeefbe duudube, halfin dun yimbe holniibe, waawaybe kajun kadi jannude wobbe goo. ³ Tampidu e an wa suufaajo moyyo Iisaa Almasiihu on. ⁴ Ko fii si suufaajo golloowo golle mun no faalaa weltinde hooreejo mun on, o hilnotaako haajuji goo. ⁵ Ko fii foolotirteedo e dogudu wadantaake *meetelol si o wadiraali no haaniri non. ⁶ Ko remoowo wakkiliido on haani adaade hendaade gebal mun ngal ka baagol. ⁷ Hakkilan koo ko mi woni wi'ude, ko fii Joomiraado on yedete faamu e di fow.

⁸ Anditii fii Iisaa Almasiihu, on immitiido e hakkunde maybe ben, iwrudo e bolondaa Daawuuda on, wano Kibaaru Moyyo mo mi woni yottinde on wi'iri non,
⁹ on mo mi tampani haa mi habbiraa wa wadoowo bone. Kono daaluyee Alla on habbaaka.¹⁰ Kodun wadi si mido wakkilii fow sabu subaabe ben, fii kambe kadi no be hebira kisiyee wondo e Iisaa Almasiihu on, wondude e darja poomayankeejo on. ¹¹ Ngol kongol ko haqiqawol wonde:

Si en maayidii e makko,

en wuuritidoyay kadi e makko.

¹² Si en ñajnike,
en laamodoyay kadi e makko.
Si en yeddii kadi fii makko,
kanko kadi o yeddayay fii men.
¹³ Si tawii en sellaa-finde,
kanko ko o sella-findeejo,
ko fii o waawataa yeddaade.

Fii Golle Moyye

¹⁴ E hino ko haanudaa andintinde kon: jeejaa yimbe ñen yeeso Alla wonde, yo ñe accu poodotiro haala ka aldaa e nafa. Si hinaa dun, ñun nawray hedotoobe ñen e majjere.¹⁵ Eto no weebitoraa yeeso Alla wa neddo haanaado jabeede, dun ko golloowo mo hersaa, e tindinoowo daaluyee goongaajo on no feewiri. ¹⁶ Reenodaa e haalaaji mehi di yaadaa e faale Alla on, ko fii jokkube di ñen burtay tun wodditaade Alla. ¹⁷ Ko fii kongudi mabbe ñin no layira wa nawnaare «masara.» Himenee e Fileeti no tawaa e ñen, ¹⁸ ñen selube goonga on, no bonnira gomdinal wobbe ñen wi'ugol wonde ummutal ngal wadiino. ¹⁹ E hin-le hayre didol tiidunde nde Alla wadi nden no jiibi haa jooni, hinde notiraa dii kongudi doo: «Joomiraado on no andi ñe makko ñen!», awa kadi: «Kala jantiido innde Joomiraado on yo yilto e angal peewal.»^a

²⁰ E nder suudu hittundu hinaa miranji tafiraadi kanjye maa kaalisi tun woni ton, kono kunnaaje e payande leydi kadi no ton. Miranji arani ñin ko mariraadi fii haaju hittudo, kono diya ko huutorteedi fii ko woni woo. ²¹ On labbindo hoore mun e dii piiji bondi, o wonay miran hittudo, huutorteedo, laabudo, mo jom mun huutorta, hebulaniido kala kuugal moyyal.

^a2.19 Ada. 16.5

²²Awa dogu himmeeji cukankaaku din, dabbaa peewal ngal e gomdinal ngal e giggol ngol e buttu on, wondude e jantoraybe Joomiraado on bernde laabunde.²³Bugitodaa yeddondire njofooje de aldaa e nafa den, de andudaa adday hawreeji den.²⁴Ko fii haanaa ka kurkantoodo Joomiraado on habidee. Himo haani wonde newaniido fow, munjniido, o waawa jannude.²⁵Himo haani kadi wurtirde liddotoobe mo ben no newori, e nder tanyinagol wonde Alla okkay be feere no be tuubira, be anda goonga on,²⁶be ruttoo e faamu mabbe moyyo on, e no be sortora e pircol Ibuliisa nangudo be fii wadugol faale mun on.

Fii Sakkitoode Aduna on

3 ¹Awa andu wonde ka sakkitoode aduna, sattoyay fota.²Ko fii yimbe ben laatoyto burtintiniibe, yidube kaalisi, mantiibe, hownitiibe, hoynoobe, dartotoobe mawbe mun, dullube, hayfinoobe fii laawol feewungol ngol,³be yurmetaake, be rippotaako, aybinoobe, be waawataa hoore mun, hunyube, aybe moyyere,⁴janfotoobe, huuwiroobe angal faamu, heewube townitaare, yidube faale mun on buri Alla.⁵Hara hibe bangini e kene dewal ngal, kono hara hibe yeddi ko ngal wondi e bawgal kon. Awa pottito ben yimbe don.

⁶No woodi e mabbe naatoobe ka cuudi, pooda rewbe lo'ube fawiibe junuubi, be kala noone himmeeji arpii.⁷Ben rewbe no janga nande woo, kono hara be waawataa andude goonga on few.⁸Ko wano Janeesi e Jambereesi dartornoo Muusaa non, ko wano non ben yimbe kadi dartorta goonga on. Ben ko yimbe be hakkille mun bonnaa, be gomdinal mun wonaa haqiiqawal.⁹Kono be yaarataa yeeso, ko fii feetere mabbe nden banganay fow, wano no bee yimbe dido wowlaabe fii mun non.

Fii no Timotee Wakkiliniraa e ko Jannaakon

¹⁰Kono an, a catike fota e janndeeji andin e jikkuuji an din e anniyeji an din e gomdinal an ngal e munal an ngal e giggol an ngol e ɣajnaare an nden.¹¹Hida

andi kadi ko mi jokkaa kon e tampereeji an dî mi hebi e dee ca'e Antijoosi-Pisidii, Ikonium e Listaara din, e cukkande de mi hebi den e no Joomiraado on yaltinirimmi e dun fow.¹² Dun-le wuren, kala faalaabe wuuru de hoore dewal e nder humondiral e Iisaa Almasiihu on ben fow cukkete.¹³ Kono yimbe bonbe ben e yoyube ben soono woo burtay tun yaarude e nder bone on, be dayna hoore mabbe, be daynora heddiibe ben kadi.¹⁴ Kono an, cato e ko jangudaa kon, dun ko ko hendordaa hoolaare, hida andi ko hombo hebirdaa dun.¹⁵ Gila e paykunyaagal maa hida andi bindi seniidi din. Hidi waawu-maa okkude faamu fii kisiyee on sabu gomdingol Iisaa Almasiihu on.¹⁶ Kala daalol windiingol ko foofaango Alla, hingol wondi e nafa fii jannugol e hollugol ellaaji e wurtugol e ne'ugol e nder peewal,¹⁷ fii no aaden Alla on eltiree, hebulanoo wadugol kala kuugal moyyal.

4 ¹ Ko dun wadi, e yeeso Alla e Iisaa Almasiihu on, on jaawaydo wurbe ben e maybe ben, e sabu ardu makko ndun e *laamu makko ngun, mi yamirii ma, mi tentinii:² waajo fii daaluyee on, catodaa e dun, nde hebudaa fajuhun weebukun woo, maa a hebaa, hollaab e ellaaji mabbe din, felaa be, wakkilinaa be e hoore jannugol e nder munjal timmungal.³ Ko fii saa'i no aroya nde tawata yimbe ben jabataa hande kadi jannde sellunde nden, kono tippude e faaleeji mabbe din, be bannay takko mabbe karamokoobe duudube ko yewta be ko be faalaa nanude kon.⁴ Be udda noppi mabbe din e goonga on, be fewta tindi mehi din.⁵ Kono an non, wonu hakkilando e di fow, wakkilodaa tampereeji din, wadaa kuude waajotoodo fii Kibaaru Moyyo on, timminiraa golle maa den no feewiri.

⁶ Ko fii min, mido itti wonkii an kin wa sadaka hibbaado fii Alla, ko fii saa'i fokkitugol an ngol hewtii.⁷ Mi tippirii tippiro moyyo ngon, mi timminii dogudu an ndun, mi woni sella-findeejo e telen-ma gomdinal ngal.⁸ Jooni non mido maranaa *meetelol peewal ngol. Joomi on, on Naawoowo Feewudo, jonnoyay lan ngol ka jalaande sakkitorde, dun non hinaa min tun, kono ko kala himmando feejitugol makko ngol kadi.

Fii no Puulusa Waajori Timotee

⁹ Awa eto araa, tawaa mi ko buri yaawude. ¹⁰ Ko fii Demaasi tertike lan, sabu yidugol mo oo aduna fewndiido. O yahii Tesalonii. Kiriskiisu kadi yahii Galaasi, Tiituusa kadi yahii Dalamaasi. ¹¹ Ko min tun e Luuka wondi. Ardu e Markuusa, ko fii himo hitti e an fota fii golle den. ¹² Mi imminii Tikiiki Efeesi. ¹³ Nde hidha ara, addoraa burmusu mo mi acciri Karpuusi on ka wi'etee don Turuwaasi, e defte den, tentinii guri windeteedi e mun din. ¹⁴ Oo siyaakeejo wi'eteedo Aleksander wadii lan boneeji buy, kono Joomiraado on jonnitay mo ittiri kuude makko den. ¹⁵ An kadi reeno e makko, ko fii o dartike kongudi men din no tiidiri.

¹⁶ Ko mi adii dandude hoore an ka jaawirdu, hay gooto wallitanooki lan, kono fow tertino lan. Wota dun jogitane 6e. ¹⁷ Ko Joomiraado on wallitinoo lan, tiidinimmi, fii no mi timminira yottingol Kibaaru Moyyo on, e fii no leyfyi din fow nanira dun. Awa kadi mi jattinaa hunduko ngayuuri ndin. ¹⁸ Ko Joomiraado on yaltintammi e kala kuugal bongal, o dandammi fii no o naadirammi ka nder laamateeri makko kammuyankeeri. Yo mangural wonan mo haa poomaa.

Aamiina!

Fii Salminaango ngon

¹⁹ Mi salminii Piriskiila e Akiila, e beynguure Onesifoora nden. ²⁰ Awa Arastuusa kajun no Korenti. Mi accu kadi Torofiami no nawni ka saare Miletii. ²¹ Eto araa ado ndungude. Ebuluusu e Pudeniisi e Linuusa e Kaludiiyata, wondude e musibbe 6en fow salminii ma.

²² Yo Joomiraado on wondu e maa, awa kadi yo moyfere makko nden wonu e mon.

DEUXIÈME ÉPÎTRE À TIMOTHÉE

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée